



Headlines

- अज्ज श्रीनगर च जम्मू-कश्मीर कैबिनेट मंत्रियें दी बैठक लग्गोग। इस दौरान मेद ऐ जे हाल च होई दी बददल फटने आहली घटनायें ते पीड़ितें दी पुर्नबहाली ते विधानसभा सत्र जनेह एजेंडे उप्पर चर्चा होग।
- उप-राज्यपाल मनोज सिन्हा होरें कल श्रीनगर च “खेलो इंडिया Water Sports Festival” दे उदघाटनी समारोह च हिस्सा लैता ते पिच्छले 5-6 बरे च प्रदेश च होई दी खेड गतिविधियें बारे बी उनें चर्चा कीती।
- मुखमंत्रि उमर अब्दुल्ला होरें किशतवाड़ ते कठुआ च होई दी त्रासदी मगरा राहत कम्में दा जायजा लैता
- शिकारावाला-मोहसीन नै खेलो इंडिया Water Sports Festival-2025 च मर्दे दी इक हजार मीटर कयाकिंग मुकाबले च सुन्ने दा तगमा जितियै जम्मू-कश्मीर दा नां रोशन कीता ऐ।
- ते मौसम विभाग नै 23 थमां 26 अगस्त तगर जम्मू-कश्मीर च भारी बरखा ते हाड़ दी चेतावनी दिती ऐ।



JK Cabinet Meet

श्रीनगर दे सिविल सचिवालय च अज्ज मुखमंत्रि उमर अब्दुल्ला हुंदी अध्यक्षता च बड्लै 10 बजे कैबिनेट दी इक बैठक लग्गोग। किशतवाड़ ते कठुआ जिले च बददल फटने आली घटना मगरा ए पैहली कैबिनेट मिटिंग लग्गा रदी ऐ। इस दौरान मेद ऐ जे हाल च होई दी बददल फटने आली घटनाएं ते पीढ़ितें दी पुर्न ब्हाली आस्तै सरकार दे जतनें ते गैं पर चर्चा होग। कैबिनेट च सितम्बर दे अखीरे च श्रीनगर च विधानसभा सत्र लोआने बारे बी प्रस्ताव कीता जाई सकदा ऐ।



LG Water Sports

उपराज्यपाल मनोज सिन्हा होरें कल श्रीनगर दी डल झील च खेलो इंडिया वाटर स्पोर्ट्स फेस्टिवल च हिस्सा लैता। इस दे च 28 राज्य ते केन्द्र शासित प्रदेशें दे 8 सौ खडारी हिस्सा लै रदे न। उनें इनें सारें खडारियें दा सोआगत कीता। मुख्यै च पानी आली खेड्डें दी प्रमुख थाहर दे तौर पर उब्भरा रदे जम्मू-कश्मीर दी समर्थ गी उनें उजागर कीता। उप-राज्यपाल होरें इस कार्यक्रम गी शांति, प्रगति ते खेड्डें आली बददी संस्कृति आला दस्सेया। त्रै-रोजा इस उत्सव च रोइंग केनोईंग, कायकिंग दे इलावा शिकारा रेस बी दर्शक नंद लेई सकगंन। इस मौके पर बोलदे होई उपराज्यपाल होरें पिच्छले 5-6 बरे च प्रदेश च आयोजित खेड्ड गतिविधियें बारे गल्ल कीती ते इसी बेहतरीन ते शानदार दस्सेया। इस मौके पर बोलदे होई उनें युवाएं गी आक्खेया जे ओह पानी आली खेड्डें च अपने आपै गी अंतराष्ट्रीय सतह दा बनान।



CM Water Sports (Byte)

मुख्यमंत्री उमर अब्दुल्ला होंरें डल झील च आयोजित खेल्लो इंडिया वाटर स्पोर्ट्स उत्सव गी इक ऐतिहासिक पल दस्सेया। उनें आक्खेया जे ए आयोजन खेड्डें ते जम्मू-कश्मीर दी कुदरती खूबसूरती दा इक बे-जोड़ मिश्रन ऐ। डल झील दी गल्ल करदे होई उनें आक्खेया जे ए श्रीनगर दी पंछान ऐ। मुख्यमंत्री होंरें डल झील दी परानी शान गी चेता करदे होई आक्खेया जे इत्थे पानी आली खेड्डें ते मुकामी रिवायतें दी अपनी इक परम्परा ऐ। उनें आक्खेया जे खेड्डें च जितने कोला मता जरूरी ऐ उन्दे च हिस्सा लैना। उनें मेद जाहिर कीती जे एह उत्सव युवाएं गी प्रेरित करोग ते घाटी च इयै नेह कार्यक्रम होर बी आयोजित होगन, ओदे लेई बी एह आयोजन बत पदरी करोग।



CM Victims Meet

मुख्यमंत्री उमर अब्दुल्ला होंरें किशतवाड़ ते कठुआ च बददल फटने आहली घटना मगरा पीड़ितें गी दिती जा रदी राहत सहायता आले कम्में दा जायजा लैता। कल इक उच्च स्तरीय बैठक दी प्रधानता करदे होई मुख्यमंत्री होंरें फौरी तौरा पर बचाव ते राहत कम्में, लाजमी सेवार्यें दी बहाली ते आपदायें शा बचाव लेई सशक्त ते असरदार रणनीति तयार करने दी जरूरत पर बल दिता। चसोती ग्रां च होई दी त्रासदी उप्पर लो पांदे होई, उनें संवेदनशील क्षेत्रें च नियम-कायदे दी सख्ती नै पालना करने दी जरूरत उप्पर बी जोर पाया। उनें गलाया जे मुख प्राथमिकता राहत कम्में ते पुर्नबहाली गी दिती जा, जदके सरकार पुर्ननिर्माण आहले कम्मैं च सहयोग

करौंग। उनें आकखेया जे जिसलै तगर बिजली सप्लाई आहला ढांचा ब्हाल नई हुंदा उसलै तगर Generators राएं बिजली दी उपलब्धता यकीनी बनाई जा।

<><><><><><>

Dy. CM Letters

सार्वजनिक सेवायें ते नौजवानें दे सशक्तीकरण गी होर मजबूत बनाने दे ध्येइयें कन्ने उपमुखमंत्री Surinder Choudhar ते मुखमंत्री हुंदे सलाहकार नासीर असलम वाणी होरें कल श्रीनगर Civil सैक्ट्रेट च पुर्नबहाली सहायता स्कीम RAS-2025 तैहत 8 नियुक्ति-पत्र सौंपे। नियुक्त मेदवारें गी मुबारखबाद दिंदे होई उपमुखमंत्री होरें उनेंगी पूरी तनदेई, ईमानदारी ते निष्ठा कन्ने कम्म करने लेई आकखेया। सलाहकार वाणी होरें रोजगार दे बाददु मौके देने दी सरकार दी वचनबद्धता गी इक बारी परतियै पक्का किता। नमें नियुक्त कीते गेदे मेदवारें आभार प्रकट करदे होई पूरी निष्ठा कन्ने कम्म करने दा पक्का निश्चा कीता। दौनें नेताएं मुखमंत्री उमर अब्दुल्ला हुंदे नेतृत्व च जम्मू-कश्मीर च भर्थी प्रक्रिया गी होर बेहतर ते कारगार बनाने दे धेइयें गी इक बारी परतियै पक्क कीता।

<><><><><><>

Mohsin –Gold

17 बरे दे मोहसीन अली कंद जेड़े इक मुकामी शिकारावाला न खेलो इंडिया पानी आहली खेड्डें दे उत्सव-2025 च पैहला सुन्ने दा तगमा जितियै जम्मू-कश्मीर दा नां रोशन करी दिता ऐ। मोहसीन अपनी इस जित उप्पर बड़े भावुक होये ते उनें एहदा श्रेय अपने कोच बिलकीस मीर

होरें गी दिता जेड़े जे साबका अंतराष्ट्रीय ते ओलम्पिक जज न। मोहसीन दी इस शानदरा दे ऐतिहासिक जित नै पानी आहली खेड्डें च जम्मू-कश्मीर दा नां रोशन करी दिता ऐ।

<><><><><><>

Online Gaming

इलेक्ट्रानिक्स ते आई.टी मंत्री अश्विनी वैष्णव होरें आनलाइन गेमिंग दा संवर्धन ते विनियम बिल-2025 लोकसभा च पेश कीता। एह बिल ई-स्पोर्ट्स ते आनलाइन सोशल गेम्स गी बढ़ावा दिंदा ऐ ते कन्नै गै हानिकारक आनलाइन धन आधारित गेमिंग सेवाएं, विज्ञापन ते उन्दे कन्नै सरबंधत वित्तीय लैन-देन उप्पर रोक लांदा ऐ। एहदे च आनलाइन गेमिंग प्राधिकरण दी नियुक्ति दा बी प्रबंध ऐ जेड़ा इस क्षेत्र आस्तै जरूरी ऐ। एहदे राएं रणनीतिक विकास ते नियामक निगरानी बी प्रदान कीती जाग ते इस आनलाइन गेमिंग बिल 2025 दा मकसद लोकें आस्तै खास करियै युवाएं ते संवेदनशील आबादी गी इयै नेय खेड्डें दे प्रतिकूल सामाजिक, आर्थिक, मनोवैज्ञानिक ते निजता सरबंधी प्रभावे थमां बचाना ऐ। इस आनलाइन गेमिंग बिल-2025 गी लोकसभा च पास करी दिता गेआ ऐ।

<><><><><><>

JMC Drive

जम्मू म्युनिसिपल कारपोरेशन आसेया जरूरतमंद लोकें च कपड़े, जूते, कम्बल, कताबां ते होर दूआ समान बंडने बारे इक मुहिम चलाई गई। इस दा मकसद पर्यावरण दी साम्भ-सम्हाल ते समाज दी भलाई-बेहतरी हा। JMC दे कमीशनर डाक्टर देवांश यादव होरें बची दिये चीजे दा परतियै इस्तेमाल करने पर जोर पाया। JMC नेई होर मुहिमें गी जिला स्तह पर आयोजित

करने दी योजना बना रदी ऐ। ए कम्म जिला प्रशासन कन्नै रलियै कीता जाग तां जे कचरे दे प्रबंधन प्रति लोकें च जागरूकता पैदा कीती जाई सकै। कारपोरेशन नै किशतवाड़ दे चशोती पाडर आले पीढ़ितें गी राहत सहायता देने दी बी घोषणा कीती। डाक्टर देवांश यादव होरें नागरिकें गी अपील कीती जे ओ जम्मू गी साफ-स्वच्छ हरा-भरा बनाने लेई किट्ठे रलियै सक्रियता कन्नै जतन करन।

<><><><><><>

Weather

मौसम विभाग नै जम्मू-कश्मीर च 23 थमां 26 अगस्त तककर भारी बरखा ते अंधी-झक्खड़ झुलने दी पेशगोई कीती ऐ। जम्मू, रियासी, उधमपुर, साम्बा, कठुआ, राजौरी, अनंतनाग ते कुलगाम इलाके एदे करी प्रभावित होगंन, जिस्सलै कि पुंछ, रामबन, डोडा ते किशतवाड़ च दर्मयानें दर्जे थमां भारी बरखा पेई सकदी ऐ। इस अवधि दौरान विभाग आसेया बददल फटने, चानचक्क हाड़ औने, लास पस्सियां पौने ते कुप्पड़ पौने दी चेतावनी जारी कीती गई ऐ। लोकें गी सलाह दिती गई ऐ जे ओ दरेयाएं ते नालें दे कंडे नैई जान ते सुरक्षा उपाएं गी अपनान। प्रशासन नै सारे जरूरी एहतियाती उपा अपनाने ते प्रशासन आसेया जारी दिशा-निर्देशों दी पालना करने लेई आक्खेया ऐ।

<><><><><><>